

Francis Leo un biaha mas instala como Presidente di Aruba Lions Club



O R A N J E S T A D (AAN) Recientemente miembronan di Aruba Lions Club a tene nan tradicional instalacion di directiva pa aña Leonistico 2015-2016 na unda despues cu na april ultimo miembronan a scoge un directiva nobo. E Presidente actual Francis Leo a bolbe haya e confiansa di e miembronan pa sigui guia e club pa e siguiente aña. Aruba Lions Club ta un "service club" cu desde 29 september 1947 a bin ta traha na bienestar di comunidad Arubano cu enfoka riba esnan den mas necesidad. E

directiva cu a keda instala ta como lo siguiente: como presidente sr. Ir Francis A. Leo, secretario sr. Jaime Lacle, tesorero sr. Rocciny Anthony, vice-presidente sr. Gerardo Figaroa, director 1 e year sr. Randolph M. Vrolijk, director 2 e Year sr. Igor Croes, Immediate past president sr. Edwin Tromp, Tail twister/Lion Tamer sr. George Simon, Leo advisor sr. Ronald Lacle y membership Director sr. Maximilaino Arends. Sr. Francis Leo ta hopi contento di tur e trabou cu a tuma luga bou su liderazgo, unda a concentra hopi riba

cambionan interno di e club cu mester a wordo realisa. "Nos a re-inventa nos mes, den un forma di bisa, pa bay concentra riba e actividadnan cu nos tabatin hopi tempo pendiente. Pero un di e logronan mas grandi, ta cu a logra un Statuut completamente nobo, apto pa e comunidad moderno cu nos ta bibando den dje. Esaki a trece cu awendia nos tin 4 miembro femenino den e organisacion," sr. L. Hustamente durante e celebracion di eleccion di un Presidente nobo y su directiva, a instala 6 miembro nobo di Aruba



Lions Club, cual sigur ta un logro den e mundo di awendia unda cu trabou boluntario no ta asina popular manera antes. "Nos ta hopi contento pa esaki, cu a logra haya algun miembro nobo cu hopi experiencia y amor pa yuda comunidad." Esnan cu a keda instala ta: sra. Magaly Franken, sra. Doris Lacle Eugenio cu porcierto ta un ex-gobernadora di zona, sra. Jane Otis, sr. Ivan Croes, sr. Johan Richardson y sra. Raysa Wester. Durante e instalacion di directiva y miembronan nobo di Aruba Lions Club a instala tambe directiva nobo pa Aruba Leo club cu tin cu como presidente srta. Kellsy Giel. E acto di instalacion a ser hacie pa gobernador di distrito zona E-1 sr. Leo Fossi. Tambe a reconoce algun miembro cu durante e aña Leonistico a destaca den club pa nan labornan sobresaliente. Aruba Lions Club ta sigui riba e rumbo di cambio y ta studiando hunto cu e directiva y miembrecia dinamico, tur e ideanan nobo cu a wordo treci dilanti. Dentro di e tradicional eventonan cu ALC ta organisa, e miembronan a surgi pa introduci un evento nobo pa recauda fondo, cual lo mester ta algo diferente cu esnan cu e pueblo ta

custumbra cune. E rifa di cas cu e club ta tene anualmente, mirando e gastonan, no ta trece suficiente fondo aden pa ALC por sigui traha na bienestar di e comunidad. Especialmente si mira e peticionnan pa ayudo ta creciendo cada biaha. "Nos lo bini cu algo nobo, creativo y yena di ambiente, ta e unico cos cu mi por bisa," asina Presidente di ALC Francis Leo a duna di conoce. E ta spera cu tur e preparacionnan por ta cla pa lansa e proyecto aki pa final di juli awor. Den e aña aki cu e lo bay dirigi e club, segun sr. Francis Leo a comenta, lo sigui pa promove e Leo Club cu su proyectonan y otronan cu lo wordo ehecuta den combinacion cu Aruba Lions Club. Aña pasa Francis Leo a bay campaña cu e lema pa reforsa e club internamente, y e biaha aki a concentra riba dignidad, harmonia y humanidad. "Esaki ta e tres palabranan cu ta enfoca parti di nos accionnan cu ta bini den e proximo 12 lunanan di nos dilanti. E aña aki nos ta bay concentra hopi riba muchanan. Pesey ta puntra nos miembronan pa no mira kico Aruba Lions Club por haci pa nan sino kico abo como miembro por haci pa e club, Leo a termina bisando.